



Loyiha

**O‘ZBEKISTON RESPUBLIKASI QONUNI**

**Ўзбекистон Республикасининг айрим қонун ҳужжатларига ўзгартириш ва қўшимчалар  
киритиш тўғрисида  
ID-95897 (V-2)**

Кейинги йилларда республикада давлат хизматларини кўрсатишда бюрократизм, сансалорлик ва бошқа маъмурий тўсиқларни бартараф этиш, эскирган ва замон талабларига мос келмайдиган тартиб-таомилларни тубдан қисқартиришга қаратилган тизимли ишлар амалга оширилмоқда.

Жисмоний ва юридик шахслар учун давлат хизматлари кўрсатиш кўламини ошириш, аҳолининг масофадан туриб электрон давлат хизматларидан мустақил фойдаланиш имкониятларини кенгайтирилмоқда.

Шу билан бирга, масофадан туриб электрон давлат хизматларидан мустақил фойдаланиш ва зарур ҳужжатларни электрон шаклда расмийлаштиришдан кенг фойдаланишни янада қўллаб-қувватлаш, унинг ҳуқуқий асосларини мустаҳкамлаш зарурати юзага келмоқда.

Мазкур Қонун билан “Электрон ҳужжат айланиши тўғрисида”ги ҳамда “Электрон рақамли имзо тўғрисида”ги Ўзбекистон Республикаси Қонунларига электрон ҳужжатда ҳужжатни имзолаган шахснинг розилигини ифодалайдиган ҳамда уни идентификация ва аутентификация қилиш имконини берадиган электрон тасдиқлаш усуллари билан фойдаланилишга тааллуқли ўзгартириш ва қўшимчалар киритилмоқда.

**1-модда.** Ўзбекистон Республикасининг 2004 йил 29 апрелда қабул қилинган «Электрон ҳужжат айланиши тўғрисида»ги ЎРҚ-611-II-сонли Қонунига (Ўзбекистон Республикаси Қонун ҳужжатлари тўплами, 2004 й., 20-сон, 230-модда; Қонунчилик маълумотлари миллий базаси, 21.04.2021 й., 03/21/683/0375-сон) қуйидаги қўшимча ва ўзгартиришлар киритилсин:

1) 5-модданинг биринчи хатбоши қуйидаги таҳрирда баён этилсин:

“Электрон шаклда қайд этилган, электрон рақамли имзо ва (ёки) ҳужжатни имзолаган шахснинг розилигини ифодалайдиган ҳамда уни идентификация ва аутентификация қилиш имконини берадиган электрон тасдиқлаш усуллари («SMS», «Face-ID» ва бошқалар) билан тасдиқланган ва электрон ҳужжатнинг бошқа реквизитларига эга бўлган ахборот электрон ҳужжатдир.”;

2) 6-модданинг иккинчи хатбоши қуйидаги таҳрирда баён этилсин:

“электрон рақамли имзо ва (ёки) ҳужжатни имзолаган шахснинг розилигини ифодалайдиган ҳамда уни идентификация ва аутентификация қилиш имконини берадиган электрон тасдиқлаш усуллари (“SMS”, “Face-ID” ва бошқалар);”

**2-модда.** Ўзбекистон Республикасининг 2022 йил 12 октябрда қабул қилинган “Электрон рақамли имзо тўғрисида”ги ЎРҚ-793-сонли Қонуни (Қонунчилик маълумотлари миллий базаси, 13.10.2022 й., 03/22/793/0918-сон) 3-моддасининг саккизинчи хатбоши қуйидаги таҳрирда баён этилсин:

“электрон ҳужжат — электрон шаклда қайд этилган, электрон рақамли имзо ва (ёки) ҳужжатни имзолаган шахснинг розилигини ифодаладиган ҳамда уни идентификация ва аутентификация қилиш имконини берадиган электрон тасдиқлаш усуллари («SMS», «Face-ID» ва бошқалар) билан тасдиқланган электрон ҳужжатнинг бошқа реквизитларига эга бўлган ахборот.”

**3-модда.** Ўзбекистон Республикаси Рақамли технологиялар вазирлиги ва бошқа манфаатдор ташкилотлар ушбу Қонуннинг ижросини, ижрочиларга етказилишини ҳамда моҳияти ва аҳамияти аҳоли ўртасида тушунтирилишини таъминласин.

**4-модда.** Ўзбекистон Республикаси Вазирлар Маҳкамаси:

ҳукумат қарорларини ушбу Қонунга мувофиқлаштирсин;

республика ижро этувчи ҳокимият органлари ушбу Қонунга зид бўлган ўз норматив-ҳуқуқий ҳужжатларини қайта кўриб чиқишлари ва бекор қилишларини таъминласин.

**5-модда.** Ушбу Қонун расмий эълон қилинган кундан эътиборан кучга киради.

Ўзбекистон Республикасининг

Президенти

Ш. Мирзиёев